

Ils «Onkel Dagoberts» da la Svizra

La dretgira tutelara grischuna surveglia la facultad da la biadia d'Onassis

DA CLAUDIA CADRUVI / ANR

■ **Tgi che less savair, sch'in da ses parents tutga tar ils 300 pli ritgs da la Svizra, po cumprar il magazin d'economia «Bilanz». L'ediziun dal december è cumparida cun la survista actuala da las personas cun las bursas pli grassas da noss pajais.** Era sch'ins na chatta nagin aug e nagin'onda en la galaria dals ritgs, è la chausa tuttina vaira interessanta. Ins vegn da savair ch'ins na po betg sulet far daners cun aczias e chemia sco Eberle, Blocher e consorta. Na, ins sa era recaltgar pulitas summas cun legos sco *Kjeld Kirk Kristiansen* (ZG). El abitescha sper l'Aegerisee (ZG) ed ha ina bella facultad da 3 en fin 4 milliardas francs.

Schumacher en la zona agrara

Schizont cun ir memia spert cun auto pon ins ascender tranter ils 300 pli ritgs. *Michael Schumacher*, che paja pli gugent taglia en Svizra ch'insanua auter, posseda ca. ina mesa milliarda francs. El saja il meglier pajà «sportist» da quest planet, scriva «Bilanz». Anc uss paja il «sportist» sia taglia en il chantun Vad. El e sia dunna lessan dentant che lur uffant giaja en ina scola tudestga. Perquai planischan els dad ir en l'Appenzell.

Per ch'il «sportist» possia renovar sia chasa tenor ses gust, ston ils burgais da la vischnanca pertugada l'emprim anc lubir ina midada da zona. La chasa da purs appenzellaisa sa chatta numnadain anc en la zona d'agricultura.

In giuven miliardari

Dal reminent. Igl è era da star mal in zichel cun noss ritgs. En il de-

curs da l'onn passà han els pers da quai da 30 milliardas francs. Uss possedan els be pli 390 milliardas. Quai correspunda a 20 per tschient da la facultad naziunala.

Il pli ritg um svizzer è in giuven um da fatschenta e sa numna *Ernesto Bertarelli*. El stat per l'emprima giada a la testa dals ritgs e posseda ina facultad da 13 en fin 14 milliardas francs. Quella ha el e sia famiglia fatg cun la gruppa da farma e biotecnologia «Serono». Malgrà sia ritgezza è Bertarelli bunamain pli enconuscent sco navigatur passionà. Pervi dad el è ina bartga a tenda svizra era davantiers tar regattas internaziunals. Bertarelli sponsurescha la bartga «Swiss Challenge» cun sia top-crew. Quella duai gudagnar il proxim «America's Cup».

Imperis dirigids dal Grischun anor

In tozzel personas tranter ils 300 ritgs èn domiciliadas en il Grischun. I sa tracta betg da Bezzolas, Cantienis u Berthers. Il sulet «veritabel Grischun» è *Thomas Domenig*. Sia facultad munta a 300 milliuns francs. Domenig ha fatg daners cun immobiglias. La gronda part da l'onn passenta quest «veritabel Grischun» dentant a Namibia. Be per trais mais turna el a Cuira. Era per guardar tge che l'EHC fa. Il club da hockey survegn lura sia bunamaina.

Ils auters ch'èn registrads sut il chantun Grischun han magari nums exotics. Intgins dad els possedan en noss chantun ina chasa da vacanzas ed abiteschan uschiiglio insanu'uter. I dat dentant era in u l'auter miliardari che dirigia ses imperi mundial dal Grischun anor.

Cun 16 onns la pli ritga Svizra

La pli ritga dunna en Svizra ha pir 16 onns. Igl è *Athina Onassis*, la biadia dal legendar Aristoteles Onassis. El ha recaltgà ses daners cun navs da petroli. La giuvna Athina viva en il chantun Vad. Là na gaudia ella betg bleras libertads, scriva «Bilanz». Ils guardians tegnian ella cuntinuadamain en egl.

La mamma da Athina Onassis ha sia residenza principala en l'Engiadin'Auta. Perquai ha la dretgira tutelara dal Grischun da survegljar transacziuns en il concern multinaziunal da la gruppa d'Onassis. La dretgira tutelara ha da controllar la part dal concern che la biadia ha ertà.

Milliardaris «grischuns»

Dals 300 pli ritgs Svizzers vegnan 12 attribuids al Grischun. Qua lur nums ed en parantesa la facultad ed il champ da lavur principal.

Carlo De Benedetti (2 en fin 3 milliardas / finanzas, medias), *Karl Diehl* (1,5 en fin 2 milliardas / patriarc industrial da la Germania), *Paul Fentener* van Vlissingen (4 en fin 5 milliardas), *famiglia Kahane* (1 en fin 1,5 milliardas / chemia e banca), *Eliette von Karajan* (500 milliuns / musica), *Karl Heinz Kipp* (4 en fin 5 milliardas / hotels), *famiglia Livanos* (1 en fin 1,5 milliardas / bastiments da transport), *Bob Lutz* (500 milliuns / industria dad autos), *famiglia Niarchos* (3 en fin 4 milliardas / navigaziun), *Rabe Horst* (100 en fin 200 milliuns / societad da navigaziun, hotels), *Madeleine Herl Schickedanz* (2 en fin 3 milliardas / commerzi).

Bob Lutz figurescha per l'emprima giada en la gliesta dals 300 ritgs. El è naschì a Turitg, posseda dentant era in pass dals Stadis Unids. Dapi che Lutz haja ina chasa da vacanzas en l'Engiadina, turnia el era puspè savens enavos tar sias ragischs, scriva «Bilanz».



**Bob Lutz,
in mez
Grischun.** MAD